

**Kabinet lulus tambahan 200 kereta peronda untuk polis JB**  
**Malaysiakini.com**  
**Jun 21 2007**

Kabinet mengambil tindakan segera meningkatkan kekuatan pasukan polis di Johor Bahru bagi memulihkan keyakinan masyarakat di situ terhadap kewibawaan anggota polis dalam membanteras jenayah.

Empat hari lalu, sekumpulan orang ramai mengadakan perhimpunan di hadapan kediaman rasmi Menteri Besar Datuk Abdul Ghani Othman ekoran keresahan berhubung peningkatan insiden jenayah di Johor Bahru.

Ekoran itu, mesyuarat kabinet semalam meluluskan penghantaran tambahan 200 kereta peronda polis ke Johor Bahru bagi memantapkan lagi tugas rondaan pencegahan jenayah di Johor Bahru, demikian menurut laporan Bernama.

Di samping itu, Najib yang mempengerusi mesyuarat kabinet semalam berkata, jemaah menteri juga bersetuju dengan langkah polis menambah 400 lagi anggota bagi daerah Johor Bahru menjelang Ogos nanti.

"Usaha penambahan anggota ini hendaklah dibuat dengan seberapa segera yang boleh," katanya kepada pemberita di Kuala Lumpur semalam.

Menurutnya, mesyuarat kabinet telah meluluskan tiga tindakan segera bagi menangani masalah jenayah di Johor Bahru termasuk meluluskan peruntukan RM6 juta bagi pihak polis menyewa rumah kedai untuk dijadikan ibu pejabat polis daerah yang baru secepat mungkin.

Timbalan Perdana Menteri berkata, kabinet bersetuju penubuhan tiga daerah polis yang baru itu dilaksanakan dengan segera tanpa perlu menunggu pembinaan bangunan tetap.

Tiga IPD baru yang akan ditubuhkan itu ialah bagi kawasan Johor Bahru Timur, Nusa Jaya dan Kulai.

### **Naik pangkat**

Sementara itu, PDRM mengumumkan pelantikan SAC I Zul Hasnan Najib Baharudin sebagai Ketua Polis Kuala Lumpur manakala Timbalan Pengarah Siasatan Jenayah 1, Datuk Khalid Abu Bakar dilantik sebagai Ketua Polis Selangor, dengan memangku pangkat Komisioner..

Zul Hasnan, yang memangku jawatan Ketua Polis Kuala Lumpur sebelum ini, dilantik menggantikan Datuk Sulaiman Mohd Yusuf yang bersara wajib. Khalid pula menggantikan Datuk Ismail Omar yang dinaikkan pangkat selaku Pengarah Jabatan Pengurusan Polis Diraja Malaysia.

Ketua Polis Kelantan Datuk Zulkifli Abdullah dilantik Ketua Polis Perak bagi menggantikan Datuk Aziz Bulat yang bersara wajib.

Timbalan Prsuruhjaya Polis Sabah, SAC I Noor Rashid Ibrahim, dilantik sebagai Pesuruhjaya Polis Sabah. Manakala Timbalan Pengarah (Risikan/Operasi) Jabatan Siasatan Jenayah Narkotik Bukit Aman, Datuk Mohd Bakri Mohd Zinin dilantik Pengarah Jabatan Siasatan Jenayah Narkotik.

Mohd Bakri menggantikan Datuk Abang Julai Abang Wahap yang bersara wajib bulan lalu, dengan memangku pangkat Komisioner.

Pelantikan mereka yang dibuat oleh Suruhanjaya Polis Diraja Malaysia diumumkan dalam satu kenyataan oleh Penguasa Perhubungan Awam Bukit Aman, Supt Rasdi Ramli.

Timbalan Pengarah II, Jabatan Siasatan Jenayah Komersil Bukit Aman, Datuk Abdul Razak Abdul Ghani dilantik Timbalan Pesuruhjaya Polis Sabah, dan Ketua Jabatan Siasatan Jenayah Perak, SAC II Patrick Jiges Sijore, dilantik Timbalan Ketua Polis Kuala Lumpur.

Ketika dihubungi kemudian, Rasdi berkata pelantikan berkuatkuasa pada hari pegawai-pegawai ini melapor diri ke jawatan baru masing-masing.

Copyright © 1999-2007 Mkini Dotcom Sdn. Bhd.  
Source : <http://www.malaysiakini.com/news/68909>